



人事典第二十七卷

形貌部紀事三

儒林公議太祖天表神偉紫躡而豐頤見者不敢正視李煜據江南有寫御容至僞國者日益憂懼知真人之在御也

宋史太宗本紀帝幼不羣與他兒戲皆畏服及長隆準龍顏望之知爲大人儼如也

祈廷訓傳廷訓爲左領軍衛上將軍形質魁岸無才略臨事多規避時人目爲祈窳駝以其龐大而無所取也

戴興傳興開封雍丘人年十餘歲以勇力聞里中及長身長七尺餘美髭髯眉目如畫太宗在藩邸興詣府求見奇之留帳下後歷左領衛上將軍

党進傳進歷忠武軍節度卒贈侍中進出戎行形貌魁岸居常恂恂每擐甲胄毛髮皆豎

王超傳超趙州人弱冠長七尺餘太宗尹京召置麾下及卽位以隸御龍直歷崇信軍節度使

和嶠傳嶠歷知制誥判吏部銓嶠好節容儀自五鼓張燈燭至辨色冠帶方畢雖幼能屬文殊少警

策每草制必精思討索而後成拘于引類偶對頗失典故之體上以其貴家子能業文甚寵待之欲召入翰林謂近臣曰幪胖子眊眊然胷中必不正不可以居近侍也其命遂寢

趙上交傳上交身長七尺黑色美風儀善談論貢才任氣爲鄉里所推

張洞傳洞字仲通開封祥符人爲人長大眉目如畫

宗室列傳周恭肅王元儼廣顙豐頤嚴毅不可犯天下崇憚之名聞外裔

洞微志盧多遜未第時面極黑有相告曰此名敗土色貴卽明潤復來必多災多遜歷貴仕面色甚瑩將敗數日忽暗黑如故

宋史王昭遠傳繼升子昭遠形質魁偉色黑繼升名之鐵山有膂力善騎射祖母郭氏嘗對昭遠母指昭遠曰此兒有貴相他日必至公侯指昭懿曰此兒奉錢過二萬不能勝矣果皆如其言

向敏中傳敏中字常之開封人父瑀仕漢符離令性嚴毅惟敏中一子躬自教督不假顏色嘗謂其母曰大吾門者此兒也敏中隨瑀赴調京師有書生過門見敏中謂鄰母曰此兒風骨秀異貴且壽鄰母入告其家比出已不見矣

通鑑綱目李沆嘗侍宴上目送之曰風度端凝真貴人也

呂端器量寬恕知大體帝深重之每

見其入對肅然拱揖不以名呼又以端姿儀瓌大宮廷陸峻特令梓人爲納陛

宋史張洎傳洎開封人母微時生洎後入宮乳悼獻太子洎方在襁褓真宗以付內侍張景宗曰此兒貌厚汝謹視之景宗遂養以爲子後歷節度使贈太尉

王德用傳德用加檢校太尉定國軍節度使宣徽南院事趙元昊反德用請自將討之不許德用狀貌雄毅面黑頸以下白哲人皆異之言者論德用貌類藝祖御史中丞孔道輔繼言之且謂德用得士心不宜久典機密遂罷爲武寧軍節度使徐州大都督府長史

石林燕語王武恭公德用貌奇偉色如深墨當時謂之黑王相公宅在都城西北隅善撫士卒得軍情以其貌異所過閭里皆聚觀

宋史王欽若傳欽若狀貌短小項有附疣時人目爲瘰相

湘山野錄王冀公欽若鄉薦赴闕張僕射齊賢時爲江南漕以書薦謁錢希白公易時以才名方獨步館閣適會延一術士以考休咎不容通謁冀公跼促門下因厲聲詰問人術者遙聞之謂錢曰不

古今圖書集成
知何人耶若聲形相稱世無此貴者但恐形貌不副耳願邀之使某獲見希白召之冀公單微達人神骨疎瘦復贅于頸而舉止山野希白蔑視之術者悚然側目瞻視冀公起術者稽顙興嘆曰人中之貴有此十全者錢戲曰中堂內便有此等宰相乎術人正色曰公何言歟且宰相何時而無此君不作則已若作之則天下康富而君臣相得至死有慶而無弔不完者但無子爾錢戲曰他日將陶鑄吾輩乎術者曰恐不在他日卽日可待願公毋忽後希白方爲翰林學士而冀公已真拜

宋史馮拯傳拯字道濟父俊事漢湘陰公劉贊贊死俊與從行千餘人繫侍衛獄周太祖赦出之授檢校太子賓客戍安遠軍馭馬鎮辭不行因徙居河陽拯以書生謁趙普普奇其狀曰子富貴壽考宜不下我

談苑眞宗臨軒策士夜夢下有菜一苗甚盛與殿基相高及拆第一卷乃是蔡齊上見其容貌曰得人矣特詔執金吾七人清道自齊始

宋史西夏傳元昊性雄毅多大略善繪畫能創制物始圓面高準身五尺餘

王曾傳曾資質端厚眉目如畫在朝廷進止皆有常處平居寡言笑人莫敢干以私少與楊億同在

侍從億喜談諧凡僚友無不狎侮至與曾言則曰余不敢以戲也

盛度傳度以太子少傅致仕體肥大難于拜起賓客有拜之者則俯伏不能興往往瞪視而詬詈之歸田錄盛文肅公豐肌大腹而眉目清秀丁晉公疎瘦如削二公皆兩浙人也並以文詞知名于時梅學士詢在真宗時已爲名臣至慶曆中爲翰林侍讀以卒性喜焚香其在官舍每晨起將親事必焚香兩爐以公服罩之撮其袖以出坐定撒開兩袖郁然滿室濃香有寶元賓者五代漢宰相正固之孫也以名家子有文行爲館職而不喜修飾經時未嘗沐浴故時人爲之語曰盛肥丁瘦梅香寶吳也

青箱雜記王公風骨清峭頃頃微結喉有僧相人皆謂其寒薄獨一善相者目之曰公名位俱極但祿氣不豐耳故旦雖位極一品而飲啗全少不畜聲伎

宋史閻守恭傳守恭并州榆次人父榮個儻有志略劉繼元欲召至帳下辭以老母不就守恭生而體貌奇偉榮曰是必當事太平天子吾無恨矣

任中正傳中正軀幹頎長帝擇大笏命內臣取緋衣之長者賜之

古今圖書集成
馮廷璋傳廷璋美髯長上短下好修容儀雖見小吏未嘗懈惰

張商英傳商英字天覺蜀州新津人長身偉然姿采如峙玉負氣傲儼豪視一世

老學菴筆記韓魏公聲雌文潞公步碎相者以爲二公者無此二事皆非人臣之相

明道雜志潞公以太尉鎮洛師遇生日僚吏皆獻詩多云五福全者潞公不悅曰遽使我考終命耶
有一客詩云綽約肌膚如處子蓋用莊子姑射仙人事也洛人笑之曰願爾得婦色若此潞公色黔
也
歐陽文忠公應舉時常游京師浴室院有一僧熟視公公因問之曰吾師能相人乎僧曰然
足下貴人也然有二事耳白于面當名滿天下鬚不掩齒一生常遭人謗罵

石林詩話杜正獻公自少清羸若不勝衣年過四十鬚髮卽盡白立朝孤峻凜然不可屈歐陽文忠
公素出其門公謝事居宋文忠適來爲守相與歡甚公時年已八十然憂國之意每見于色歐公嘗
和公詩有云貌先年老因憂國事與心違始乞身公得之大喜嘗自諷誦當時以爲不惟曲盡公志
雖其形貌亦在摸寫中也

聞見後錄嘉祐二年秋北鹵求仁皇帝御容議者慮有厭勝之術帝曰吾待鹵厚必不然遣御史中

丞張昇遣之鹵主盛儀衛親出迎一見驚肅再拜語其下曰眞聖主也我若生中國不過與之執鞭捧蓋爲一都虞候耳其畏服如此

楊文公談苑馮暉爲靈武節度使有威名羌戎畏服號麻胡以其面有黧子也

拊掌錄科場進士程文多可笑者治平中國學試策問體貌大臣進士對策曰若文相公富相公皆大臣之有體者若馮當世沈文通皆大臣之有貌者意謂文富豐碩馮沈美少也劉原甫遂目沈馮爲有貌大臣又歐陽永叔主文試貴老爲其近于親賦有進士散句云觀茲黃耆之狀類我嚴君之容時哄堂大笑

宋史張雍傳雍以尙書右丞致仕年七十雍姿貌魯樸始登科爲滕中正壻中正子錫世寧咸笑之中正曰此人異日必顯達壽考非汝曹所及錫兄弟雖有名然終不越郎署亦無耆年者

劉安世傳安世儀狀魁碩音吐如鐘

呂大防傳大防身長七尺眉目秀發聲音如鐘自少持重無嗜好過市不左右游目燕居如對賓客每朝會威儀翼如神宗嘗目送之

古今圖書集成
文同傳同方口秀眉以學名世

賀鑄傳鑄字方回衛州人孝惠皇后之族孫長七尺面鐵色眉目聳拔喜談當世事可否不少假借雖貴要權傾一時小不中意極口詆之無遺辭人以爲近俠

老學庵筆記賀方回狀貌奇醜色青黑而有英氣俗謂之賀鬼頭喜校書朱黃未嘗去手詩文皆高不獨工長短句也潘邠老贈方回詩云詩束牛腰藏舊稿書訛馬尾辨新讎

研北雜志東坡云梅二丈聖俞身長秀眉大耳紅額飲酒過百觥輒正坐高拱此其醉也

東軒筆錄孫覺孫洙同在三館覺肥而長洙短而小然二人皆髯劉攽呼爲大胡孫小胡孫顧臨字子敦亦同爲館職爲人偉儀幹而好談兵攽目爲顧將軍而又好以反語呼之爲頓子姑攽嘗與王介同爲開封府試官試節以制度不傷財賦舉子多用畜積字畜本音五六反廣韻又呼玉反聲近御名介堅欲黜落攽爭之遂至誼忿監試陳襄聞其事二人皆贖金而中丞呂公著又言責之太輕遂皆奪主判是時雍子方爲開封府推官戲攽曰據罪名當決臀杖十三攽答曰然吾已入文字矣其詞曰切見開封府推官雍子方身材長大臀腿豐肥臣實不如舉以自代合坐大笑

石林燕語呂丞相微仲性沉厚剛果遇事無所爲屈身幹長大而方望之偉然初相蘇子瞻草麻云果毅而達兼孔門三子之風直大以方得坤爻六二之動蓋以戲之微仲終身以爲恨言固不可不
育也

懶真子蔡忠懷確持正年二十許歲時家苦貧衣服稍敝一日與羣士人張湜師是同行張亦貧儒也俄有道人至注視持正久之因謾問曰先生能相乎曰然又問曰何如曰先輩狀貌極似李德裕持正以爲戲已復相師是曰當爲卿監家五十口時指持正云公當死矣道人旣去二人大笑曰狂哉道人以吾二人貧儒故相戲耳後持正謫新州凡五年一日得師是書云以爲司農無補然闔門五十口居京師食貧近蒙恩守汝州持正讀至此忽憶道人之言遂不復讀數日得疾而卒

泊宅編尙書右丞胡宗愈夫人丁氏司封員外郎宗臣之女自幼穎慧無所不能其善相人蓋出天性在西府時嘗于窗隙遙見蔡丞相確謂右丞曰蔡相全似盧多遜或以盧蔡肥瘠色貌不同詰之丁氏曰吾雖不及見盧但嘗一觀其畫像與今丞相神彩相似爾後蔡果南竄

可談余表伯父袁應中博學有時名以貌寢諸公莫敢薦紹聖間蔡元度引之乃得對袁薦肩上短

下陋又廣顙尖額面多黑子望之如灑墨聲嗔而吳音哲宗一見連稱大陋袁錯愕不得陳述而退
搢紳目爲奉勅陋朝士王迴美姿容有才思少年不甚持重間爲狎邪輩所誣播入樂府今六么所
歌奇俊王家郎乃迴也元豐中蔡持正薦之可任監司神宗忽云此乃奇俊王家郎乎持正叩頭謝
罪

貢父詩話蘇子美魁偉與宋中道並立下眎之笑曰交不著

京師市井語也

號爲錐宋爲其穎利而么麼云

贈詩曰譬如利錐末所到物已破後倅洛州洛本趙地有毛遂塚聖俞遂舉處囊事爲送行詩戲之
夢溪筆談王荆公面鰐黑門人憂之以問醫醫曰此垢汙非疾也進澡豆令公頰面公曰天生黑于
子澡豆其如予何

清波雜志蕭注字巖夫裕陵問曰聞卿有袁許之學因問王安石注曰安石牛耳虎頭視物如射意
行直行敢當天下大事

青箱雜記安國俊邁而貌陋黑肥熙寧中與余同官于洛下嘗謂余曰子可作詩贈我余因援筆戲
之曰飛卿昔號溫鍾蕞思道通俛還魁肥江淹善噉筆五色庾信能文腰十圍只知外貌之粉澤誰

料滿腹填珠璣相逢把酒洛陽社不管淋漓身上衣安國由此不悅

退朝錄邇英閣講諷之所也閣後有隆儒殿在叢竹中制度特小王原叔久在講筵而身品短同列戲之曰宜爲隆儒殿學士

談苑林瑀王洙同作直講林謂曰何相見之闊也王曰遭此霖雨瑀云今後轉更疎闊也王曰何故答云逢這短晷蓋譏王之侏儒 館中鐵火罩鄭天體戲王原叔云此王將軍拋鏐亦謂其侏儒也

游宦紀聞蜀之岷山有焦夫子國初時人以其名以博學教導後進故世以夫子稱貌陋且恠長目廣鼻虬髯垂覆性率不自飾雖冠帶往往爬搔捫虱然爲歌詩有驚人句今蜀人止能誦其一聯云兩輪日月磨興廢一合乾坤夾是非熙寧中文與可因至天彭館于徐公園杯酒譚笑中肆筆成夫子像于亭之壁曲盡寒酸態度

避暑錄話元豐間道士陳景元博識多聞藏書數萬卷士大夫樂從之遊身短小而偃師孟嘗從求相鶴經得之甚喜作詩親攜往謝末云收得一般瀟灑物龜形人送鶴書來徐舉首自操吳音吟諷

之諸弟子在旁皆忍笑不能禁時王侍郎仲至在坐顧景元不覺失聲幾仆地

湘山野錄潘佑有文而容陋其妻右僕射嚴續之女有絕態一日晨粧佑潛窺于鑑臺其面落鑑中妻怖遽倒佑怒其惡己因棄之

過庭錄神廟大長公主哲宗朝重于求配過士族中求之莫中聖意帶御器械狄詠頗美丰姿近臣奏曰不知要如何人物哲宗曰人物要如秋詠者天下謂詠爲人樣子狄詠狄青子也

續筆記蔡元度對答喜笑溢於顏面雖見所甚恨者亦親厚無間人莫能測謂之笑面夜叉盛章尹京典藩以慘毒聞殺人如刈草菅然婦雌聲欲語先笑未嘗正視人或置人死地時亦柔懦不異平日此尤可怪也

宋史王黼傳黼爲人美風姿目睛如金有口辯才疎雋而寡學術然多智善佞

范廷召傳廷召弱冠身長七尺餘有膂力

墨莊漫錄班行李質人材魁岸磊落甚偉徽廟朝欲求一人相稱者爲對竟無可儷當時同列目爲察隻子京師俚語謂無對者爲察隻建炎三年擢權殿帥許道寧工傳神每見人寢陋者必戲

寫貌于酒肆識者皆笑之爲其人毆擊之碎衣敗面而竟不悛

王氏談錄公爲舒城尉馬亮鎮廬江始入謁謂公曰君狀貌類宋尙書白材質正與君等他日亦不下此人後入上庠暇日謁邢侍讀公甚喜歡曰君異時之孫馮也

行都紀事岳侯軍中一兵犯法梟首妻方懷妊後誕一子如常人軀幹甚偉首僅如拳眉目皆雕刻則胞胎所係父母相爲感應

睽車志向汲與其弟孿生狀貌酷相肖人不能辨一日汲自外歸弟婦以爲其夫也迎而呼之不應隨而置之遂批其頰汲正謂之曰我乃伯也婦惶愧而退汲自是更其衣冠以自別

青箱雜記解賓王仕至工部侍郎爲人方頤大口敦龐重厚左足下有黑子甚明大

問奇類林周益公長身瘦面狀若野鶴在翰苑多年壽皇一日燕居歎曰好一箇宰相但恐福薄耳蓋疑其相也一老璫在旁徐奏曰官家所歎豈非周必大乎上曰爾何知曰臣見司馬光像亦如必大清臞上爲之一笑未幾遂登庸爲太平宰相與聞揖遜之盛出鎮長沙退休享清閒之福十有餘年

墨客揮犀彭淵材初見范文正公畫像驚喜再拜前罄折稱新昌布衣彭几幸獲拜謁既罷熟視曰有奇德者必有奇形乃引鏡自照又將其鬚曰大略似之矣但只無耳毫數莖耳年大當十相具足也又至廬山太平觀見狄梁公像眉目入鬢又前再拜贊曰有宋進士彭几謹拜謁又熟視久之呼刀鐸者使剃其眉尾令作卓枝入鬢之狀家人輩望見驚笑淵材怒曰何笑吾前見范文正公恨無耳毫今見狄梁公不敢不剃眉何笑之乎耳毫未至天也剃眉人也君子修人事以應天奈何兒女子以爲笑乎吾每欲行古道而不見知于人所謂傷古人之不見嘆吾道之難行也

宋史周起傳起字萬卿淄州鄒平人生而豐下父意異之曰此兒必起吾門因名起幼敏慧如成人丁大全傳大全字子萬鎮江人面藍色

李全傳李全者濰州北海農家子同產兄弟三人全銳頭螭目權譎善下人

文天祥傳天祥體貌豐偉美皙如玉秀眉而長目顧盼炯然

金史世宗本紀世宗光天興運文德武功聖明仁孝皇帝諱雍本諱烏祿太祖孫睿宗子也母曰貞懿皇后李氏天輔七年癸卯歲生于上京體貌奇偉美鬚髯長過其腹脅間有七子如北斗形

雷淵傳淵爲人軀幹雄偉髯張口哆顏渥丹眼如望洋遇不平則疾惡之氣見於顏間或嚼齒大罵不休雖痛自懲創餘亦不能變也

溫迪罕達傳達字子達本名謀古魯蓋州按春猛安人性敦厚寡言笑初舉進士廷試搜閱官易達貌小謂之曰汝欲求作官邪達曰取人以求學不以年貌衆咸異之

李獻能傳獻能爲人眇小而墨色頗有髯善談論每敷說今古聲鏗亮可聽

王子可傳予可爲人軀幹雄偉貌奇古戴青葛巾項後垂雙帶若牛耳一金鏤環在頂額之間兩頰以青涅之爲翠靨衣常不能掩脛落魄嗜酒每入城市人爭以酒食遺之夜宿土室中夏月或尸穢在傍蛆蟲狼藉不恤也人與之紙落筆數百言或詩或文散漫碎雜無句讀無首尾多六經中語及韻學家古文奇字字畫峭勁遇宋諱亦時避之或問以故事其應如響諸所引書皆世所未見談說之際稍若有條貫則又以誕幻語亂之

元史康里脫脫傳脫脫父曰牙牙由康國王封雲中王阿沙不花之弟也脫脫姿貌魁梧少時從其兄幹禿蠻獵于燕南幹禿蠻使歸獻所獲世祖見其骨氣沉雄步履莊重歎曰後日大用之才已生

古今圖書集成
于今卽命入宿衛

何榮祖傳榮祖狀貌魁偉額有赤文如雙樹背負隆起有相者謂曰子位極人臣且壽相也

史天澤傳天澤字潤甫秉直季子也身長八尺音如洪鐘善騎射勇力絕人

李洞傳洞骨骼清峻神情開朗秀眉疎髯目瑩如電顏面如冰玉而脣如渥丹然義冠褒衣望之者疑爲神仙中人也

察罕帖木兒傳帖木兒字瑞廷系出北庭曾祖闊闊台元初隨大軍收河南至祖乃蠻台父阿魯溫皆家河南爲潁州沈丘人察罕帖木兒幼篤學嘗應進士舉有時名身長七尺修眉覆目左頰有三毫或怒則毫皆直指居常慨然有當世之志

張起巖傳起巖面如紫瓊美髯方頤而眉目清揚可觀望而知爲雅量君子及其臨政決議意所背鄉屹若泰山不可回奪或時面折人面頸發赤不少恕廟堂憚之

王克敬傳克敬幼奇穎嘗戲道旁丞相完澤見之謂左右曰是兒姿貌秀偉異日必令器也

趙孟頫傳行臺侍御史程鉅夫奉詔搜訪遺逸于江南得孟頫以之入見孟頫才氣英邁神采煥發